


AG CEANNACH MILSEÁN



Pictiúr: Radharc:

(a) An seomra suite, Aintín Máire ag teacht isteach an doras; Páid, Bríd agus Nóirín sa seomra suite ag fáiltiú roimpi, píosaí airgid le cur i lámh na haintín de réir mar a oireann. (b) Laistigh den siopa milseán, an siopadóir taobh thiar den chuntar; úll, barra seacláide agus milseáin le cur i lámha na bpáistí de réir mar a oireann; ceithre phingin. Comhartha ceiste agus ciorcal cainte.

Gníomhartha agus geáitsíocht a dhéanamh de réir mar a bhíonn gá leo.

CÉIM 1. CLOISTEÁIL AGUS AITHINT

Cuntas Reatha

An Domhnach a bhí ann. Tháinig Aintín Máire ar cuairt. Thug sí airgead do na leanaí. Rith an triúr acu go dtí an siopa. Cheannaigh

Brid úll agus barra seacláide. Cheannaigh a deartháir a lán milseán. Níor cheannaigh Nóirín aon rud fós.

Agallamh

- AN SIOPADÓIR: Céard atá uaitse, a Nóirín?
 NÓIRÍN: Ba mhaith liom úll más é do thoil é.
 AN SIOPADÓIR: An bhfuil mórán airgid agat?
 NÓIRÍN: Tá ceithre phingin agam.
 AN SIOPADÓIR: Seo duit úll, mar sin.
 NÓIRÍN: Go raibh maith agat.

CÉIM 2. AITHRIS

CÉIM 3. ATHRÁ Ó SPREAGTHAIGH

- (a) Spreagthaigh shúl (mar atá i gCéim 1);
 (b) Spreagthaigh chluas:

Cén lá a bhí ann?
 Tháinig duine éigin?
 Céard a rinne sí?
 Inis dom faoin triúr acu.
 Céard a rinne Bríd ansin?
 Agus a deartháir?
 Céard faoi Nóirín?

Cuir ceist ar Nóirín, a “shiopadóir”.
 Inis dó, a “Nóirín”.
 Cuir ceist uirthi faoin airgead, a “shiopadóir”.
 Inis dó, a “Nóirín”.
 Tabhair úll di, mar sin, a “shiopadóir”.
 Céard a deir tú anois, a “Nóirín”?

CÉIM 4. CLEACHTADH MÚNLAÍ AGUS FOCLÓRA

1. *Tháinig Aintín Máire.*
(*anois, gach lá, amárach; níor, ar?: inné; an? ní: amárach*).
2. *Thug sí airgead dóibh.*
(*anois, gach lá, amárach; ar? níor: inné; an? ní: amárach*).
3. *Thug sí airgead do na páistí.*
(*tusa, mise, eisean, sibh, iadsan, Seán*).
4. *Céard atá uait?*
(*tusa, an siopadóir, eisean, Máire*).

CÉIM 5. SAORCHOMHRÁ CRUTHAITHEACH

1. Aithris ar an mbunchomhrá.

2. Drámaí beaga:

- (a) Chaill Páid an briseadh—an chaint a tharla idir Páid agus Mamaí.
- (b) Páiste mar shiopadóir, páistí eile ag ceannach milseán, etc.

3. Cuntas ó pháistí ar “Lá ag Siopadóireacht”.
4. Comhrá faoin bpictiúr agus ceisteanna ó pháistí ar a chéile agus ar an múinteoir.

Rann Ceoil (An ceol ar théip)

Leathphunt milseán, más é do thoil é,
Barra seacláide, más é do thoil é,
Úll is oráiste, más é do thoil é,
A deir na leanaí sa siopa.

Curfá

Sa siopa, sa siopa,
Ag ceannach milseán sa siopa,
Sa siopa, sa siopa,
Ag ceannach milseán Dé Domhnaigh.